

## **Ye's mke' Apost Pab lo re wez nzi Efeso**

### *Pab ni dyux*

<sup>1</sup> Na, Pab, apost chan' Jesucrist, xa' mtel' Dios xaja' nchola's Dios, ngeke'n ye's re' lo re men nayon chan' Dios, men thibla' ndo lo Crist Jesús, nzi yez Éfeso.

<sup>2</sup> Xud na' Dios nde Jesucrist Xa' Nyebe' ta' Xa' lo go' yalwen nde yalnabe'z.

### *Re yalwen jwan' nkaya' men ndli lazon' Crist*

<sup>3</sup> Nabe'z toz nak Dios, Xud Jesucrist Xa' Nyebe' lon', mbli ley' Xa' na' por Crist kon reta yalwen jwan' na'ngenta lo izyo re', jwan nde lo be'.

<sup>4</sup> Axta sen' tera' toxkwa' Dios izyo, mbli Dios na' por Crist, sa ak na' men nayon nde men nambila's lo Dios.

<sup>5</sup> Tak nke' lazo' Dios na', nzola yek Xa' kaya' Xa' na' xaja xin' Xa' por Jesucrist, Dios mbli jwan' re' tak mbro' lazo' Xa'y nde xgab Xa' ngok li Xa'y.

<sup>6</sup> Sa nabe'z nin' xis Dios por yalwen toz chan' Dios jwan' mda' Dios lon' por kwent chan' Xin' Dios, Xa' ta nke' toz lazo' Dios.

<sup>7</sup> Por Crist, lo mxyo ren Xa' mdi'x Xa' sa mtola' Xa' na', nde mton' Dios xken na', tak naro toz tir nak yalwen chan' Dios,

<sup>8</sup> jwan' axta mbrid nda'b mda' Xa' lo na', jwan' nak yalnchak nde yalnchen men,

<sup>9</sup> mblo' Xa' lon' jwan' nzo naga's ndono Xa', jwan' re'ya mbli Xa'y kon dib nzo lazo' Xa' por Crist,

<sup>10</sup> sen' yoxo'b be'y, Dios li jwan' nak xgab Dios nde thope Xa' reta jwan' nzi lo be' nde jwan' nzi lo izyo nde tan' Xa'y xan' yalnyebe' chan' Crist.

<sup>11</sup> Por Crist, mbli Dios na' sa ak na' men yez Dios, ta xa nzola yek Xa' axta pola, nde kayan' reta jwan' mkeyek Xa' ta' Xa' lon', tak Xa' ndli sa nchak reta jwan' a xa nchola's Xa'.

<sup>12</sup> Jwan' re' mbli Dios sa re ná', jwan' ta mtob ner xgab ná' lo Crist, li ná' sa reta men nabe'z ni xa' xis yalnaro chan' Dios.

<sup>13</sup> Nde taga' reta go' men jwan' na'nakta Judi, lo mbin go' di's li, di's wen chan' Dios jwan' mtola' go', nde lo mbli lazo' go' Crist, Dios mtob be' Xa' go' kon Mbi Nayon jwan' mkeyek Xa'.

<sup>14</sup> Jwan' na nak be' ndlo' lipa mda' Dios xki's Dios lon' sa kayan' jwan' mkeyek Dios, axta kebe' thiptane tola' Dios re men Xa', sa nabe'z ni reta men xis Dios por yalnaro chan' Xa'.

### *Pab nya'b lo Dios por re wez nzi Éfeso*

<sup>15</sup> Jwan' nasa noga na, sen' mbin na xa ndli lazo' go' Jesús Xa' Nyebe', nde xa nke' lazo' go' re men nayon chan' Dios,

<sup>16</sup> na'nzanta na nda'n dyux lo Dios por reta go', thibla' ntelas na go' lo ndyodi'snon Dios.

<sup>17</sup> Nya'b na lo Xud na' Dios Xa' naro toz nak, Xa' nak Dios chan' Jesucrist Xa' Nyebe' lon', ta' Xa' Xbin Xa' lo go', sa ak go' men nzo xgab yek na' nde ko'xo'b Xa' lo go' sa jwin yen go' xamodpa nak Xa'.

<sup>18</sup> Nya'ba na lo Dios sa yaxni yek go', nye go' cho kwan nak jwan' taja' ngembed re men ta mbrez Dios, nde noga yen go' plopa naro nak nde ntak re yalwen jwan' mkeyek Dios ta' Xa' lo re men nayon chan' Xa',

<sup>19</sup> nde nye go' plopa' naro toz tir nak yalne chan' Dios jwan' ndla'sto reta na' ta ndli lazon' Dios. Le'ga yalne ro toz re'

<sup>20</sup> jwan' mblo'xban Crist xij re xa' nguj, nde mtoba Crist lad ban Dios lo be',

<sup>21</sup> ndob nyebe' Crist xis reta xbi jwan' nyebe', xis re xbi jwan' nchap yalnyebe', xis re xbi jwan' ngeno yalne, nde lo reta xbi jwan' nchap yalnaro toz, le' yalnyebe' chan' Crist mas ntaka lo reta xa' nyebe' re', na'nakte benta lo re xa' nyebe' naya noga lo re xa' yoche wiz jwan' nara nde.

<sup>22</sup> Dios mtan' reta jwan' xan' yalnyebe' chan' Crist, nde taga' mto Dios Crist sa Xa' ak yek lo reta men jwan' ndli lazon' Xa'.

<sup>23</sup> Re men ya nak dib ben Crist, men jwan' mkaya' dib yalne chan' Crist nde Crist nak Xa' nda' yalnaban lo reta jwan' dib nax.

## 2

### *Yalwen chan' Dios ntola' men*

<sup>1</sup> Nde Xa' mbli sa mban go', lo ngujla go' por re xken go' nde jwan' narax mbli go'.

<sup>2</sup> Mketete go' lo re jwan' narax, xaja ndli re men jwan' na'ndlid lazon' Dios, mxo'b yek go' Maxu', xa' ro jwan' nyebe' lo re xbi narax jwan' ngete lo mbi, xbi re' axta naya nyebe'y len' lazo' re men jwan' na'nxobyekta Dios.

<sup>3</sup> Noga' na' taga' mban na' pola, mblin' re jwan' narax ndyabla's bel' na', mblin' jwan' nchola's bel' na' nde jwan' nyebe' xgab na', nzal' na' ntoti Dios na' ta xa toti Xa' temas ra' men.

<sup>4</sup> Per Dios, jwan' toz tir ndlat lazo' Xa' men, nde jwan' toz mke' lazo' Xa' na',

<sup>5</sup> Tenyega ngujla na' por xke reta jwan' narax mblin', Dios mbli sa mbro'xban na' kon Crist. Por yalwen chan' Dios mblya' go'.

<sup>6</sup> Nde thihta mblo'xban Dios na' kon Crist, nde mtob Dios na' lo be' kon Crist Jesús,

<sup>7</sup> Jwan' re' mbli Xa' sa wiz jwan' nara' ye'd lo' Xa' lo re men plopa' naro toz tir nak yalwen chan' Xa' nde plopa' nke' lazo' Xa' men, por Crist Jesús.

<sup>8</sup> Tak por yalwen chan' Dios mtola' Xa' go', lo mbli lazo' go' Crist. Na'go'da mbliy, che'la jwan' ndala's Dios naka,

<sup>9</sup> nanaktey por re jwan' ndli go', sa na'ngencho xyal'.

<sup>10</sup> Tak Dios mtoxxkwa' na', nde por Crist Jesús mbli Xa' mban na' sa lin' jwan' wen, jwan' ax mtan'la Dios sa ta ndali na'y.

*Por Jesucrist thita nak reta na'*

<sup>11</sup> Jwan' na sa, re go' men bi' jwan' ndole men na'ngenta be' lad na', lo re xa' nge be' lad na',\* per jwan' na ben'ta naka thi jwan' xis bel' xa' nde na'nse'de lazo' xa'.

<sup>12</sup> Ptela's go', pola na'nzolod go' Crist, na'nakta go' xa' Israel, nde na'nzolod go' re jwan' mkeyek

---

\* **2:11 2:11** circuncisión: men jwan nacho' yid lad na' ten' nak lad men bi' ba. Incircuncisión: men jwan na'nacho'da yid lad na' ten' nak lad men bi' ba

Dios lo re xa' Israel, nzo go' lo izyo re' nde ngenkwan ngembed go' lo Dios neka nzolo go' Dios.

<sup>13</sup> Per naya ta ndono go' Jesucrist, na'ndotra' go' tij lo Dios tak lo ta mxyo ren Crist, jwan' na mbli mbike gax go' lo Dios.

<sup>14</sup> Tak Crist nak yalnabe'z xij na', tak lo rop yez mblilal Xa' thitey, nde mtub Xa' pto ta ndo tow' lo rop yez.

<sup>15</sup> Crist, lo ta nguj Xa', mkib Xa' ley nde reta jwan' nyebe'y li men, sa tamod lo rop yez mblilal Xa'y thita yez kub, tamod mbli Xa' ngo yalnabe'z.

<sup>16</sup> Por nguj Crist lo kruz, mkib Xa' yalnayi' nzino rop yez, nde thipta mblilal Xa' ropa nde noga mtoyal Xa' kwent chan' rop yez kon Dios.

<sup>17</sup> Crist mbye'd Xa' nde mdej Xa' di's wen chan' yalnabe'z lo re go' jwan' nzi tij nde lo re ná' jwan' nzi gax lo Dios;

<sup>18</sup> tak por Jesucrist, reta na' toyal biken' lo Xud na' Dios, tak thita Mbi Nayon ndonon'.

<sup>19</sup> Jwan' nasa na'naktra' go' men thiblad, nekla men xa'ga izyo, che'la naya noga go' nak men yez nayon chan' Dios nde men liz Dios.

<sup>20</sup> Go' nak xaja thi yo ndoya' ba, nde jwan' ndenke' go' nak re jwan' mblo' re apost nde profet, nde Jesucrist nak ke mas ntak jwan' ndenke' dib yo ya,

<sup>21</sup> kon Xa' jwin ndoya' diba nde taga' Xa' ndli ndoxena sa aka thi yodo' nayon lo Xa' Nyebe'.

<sup>22</sup> Nde lo ta thita nak go' kon Crist, thita mtob Xa' go' kon re xa' ndli lazon' Crist sa yolal go' yodo' ten' nzo Dios por Mbi Nayon.

### 3

#### *Sin' jwan' ndli Pab lo re xa' na'nakta judi*

<sup>1</sup> Por lo jwan' re', na Pab, nge'n lizyi'b por ndej na Jesucrist par yalwen lo re go' ta nanakta men judi.

<sup>2</sup> Tak mnen, mbinla go' xa nak yalwen chan' Dios jwan' mtan'no toz Xa' lon sa tej nay lo go',

<sup>3</sup> Dios mblo'to lon jwan' naga's ndono Xa', ta xa mke'la na lud jwan' re' lo go',

<sup>4</sup> lo lab go' jwan' mke'n lo go', tne go' nzolon jwan' naga's ndono Dios, jwan' ngok por Jesucrist.

<sup>5</sup> Jwan' naga's ta ndono Dios na'ngotod Xa'y lo re men ngo pola, ta xa mblo'to Xa'y naya por Xbin Xa' lo re apost nde re profet nayon chan' Xa'.

<sup>6</sup> Xgab jwan' ndono Xa' nak: Le' re xa' jwan' na'nakta judi nde re xa' judi thita kaya' xa' reta yalwen jwan' taya' Dios, thita yez ngolal xa' nde thita kaya' xa' reta jwan' mkeyek Dios ta' Dios por Crist Jesús lo ndli lazo' xa' di's wen chan' Dios.

<sup>7</sup> Di's wen re' ta ndej na, por yalwen chan' Dios mda' Xa' sin' re' lin, tamod ndlo' Xa' yalne chan' Xa'.

<sup>8</sup> Te'nye na nak xa' mas lud ntak xij reta men nayon chan' Dios jwan' mas lud ntak, per lon mda' Dios sin' wen re' sa tej na xki's Dios lo re xa' nanakta judi plopa' naro nak re jwan' wen toz tir nda' Crist.

<sup>9</sup> Dios mtan'no Xa' na sa goxkan na lo reta men jwan' naga's ndono Xa', tak Xa', nak Xa' mtoxkwa' reta jwan', jwan' re' ndono xka's Xa' axta sen' ndobte ner reta jwan'.

<sup>10</sup> Jwan' re' mbli Dios sa por re men yodon' Dios naya lo' Dios lo reta xa' jwan' ngeno yalnebe' nde yalne lo be' plopa' naro nak yalnchak chan' Dios lo reta jwan' ndli Dios,

<sup>11</sup> ta xata nak xgab adi' ndono Dios jwan' mbli Dios kon Jesucrist Xa' Nyebe' lon'.

<sup>12</sup> Lo ta ndli lazon' Xa', toyal biken' dib xla's na' lo Dios nde ngenkwan li zyebe na'.

<sup>13</sup> Jwan' nasa, nya'b na lo go' na'akropta xgab go' por reta yalti jwan' ndori'd na por go', che'la naka thi jwan' li naro go'.

### *Plopa' nke' lazo' Jesucrist men*

<sup>14</sup> Re jwan' re' ndli sa ndyoxub na lo Xud Jesucrist, Xa' Nyebe' lon',

<sup>15</sup> por Xa' sa nzo reta jwan' nzi lo be' nde nzi lo izyo.

<sup>16</sup> Nya'b na lo Dios sa lo yalnaro toz chan' Xa' kone Xa' ten' mas na's len' lazo' go' por Mbi Nayon chan' Xa',

<sup>17</sup> sa yo Crist len' lazo' go' lo ndli lazo' go' Xa', sa xyen na nde ne tyo jwan' ta nke' lazo' go' ta men go',

<sup>18</sup> tamod go' nde reta men yez nayon chan' Dios tli go' gan yen go' plopa naxena, nol'la, na'za nde gap toz nak yalnke' lazo' Dios men.

<sup>19</sup> Nya'b na lo Dios sa yolo go' plopa' nke' lazo' Crist na', naro toz tira lo reta jwan' toyal yolo men, nde sa ak go' xa nak Dios.

<sup>20</sup> Nde Xa' jwan' ngeno yalne sa li Xa' masra' lo re jwan' ndlin' xgab nde jwan' nya'b na' lo Xa', ndli Xa'y por yalne chan' Xa' jwan' ndonon'.

<sup>21</sup> Reta men yodon' Dios nde Jesucrist li naro xa' Dios, naya nde thibtane. Tamod aka

## 4

### *Dios mbrez na' thita ak na'*

<sup>1</sup> Jwan' nasa, na ta ngen lizyi'b tak ndlin sin' lo Xa' Nyebe', nya'b na lo go' sa naxuta kete go' lo jwan' mbrez Dios go', ta xaga ndablo kete go'.

<sup>2</sup> Thibla' nado' nde nabe'z gok go' lo re men, bxek go' nde bke' lazo' go' re men ndli lazon' Dios.

<sup>3</sup> Pchal go' sa thita ak go' por Mbi Nayon sa thibla' nabe'z kwe go'.

<sup>4</sup> Thita bel' nak na' nde thita Mbi Nayon ndonon', thita lo jwan' ngembed na', jwan' mkeyek Dios ta' Xa' lon' sen' mbrez Xa' na';

<sup>5</sup> thita Xa' Nyebe' lon', thita jwan' ndli lazon', thita mtan' Dios ryo'le men,

<sup>6</sup> thita Dios nde Xud reta na', Xa' jwan' nyebe' lo reta na', ndli rsin' Xa' na' lo rsin' Xa', nde nzo Xa' lazo' reta na'.

<sup>7</sup> Per lo kad thiba na' nda' Crist axa nchola's Xa' xaxa'ga jwan' toyal lin' sa lin' rsin' Xa'.

<sup>8</sup> Jwan' nasa lo xki's Dios nchab:  
Ngwap Xa' gap, mbe' Xa' re men nzo now'yo  
nde mdala's Xa' re yalwen chan' Xa' lo re men.

<sup>9</sup> Mbay, ¿cho kwan' ndeja ta nchaba "ngwap Xa' gap"? Ndeja na nerla mdola Xa' ten' mas na's len' izyo.

<sup>10</sup> Xa' ta mdola mbye'd lo izyo re', le'ga Xa' ya ta ngwa'p ten' mas ga'p lo be', sa Xa' tyo dib nax.

<sup>11</sup> Nde le'ga Crist mda' lo men jwan' toyal li men, cho xa' nak apost, cho xa' nak profet, cho xa' ndye



ta' xki's Dios, cho xa' nkenap re men yez Dios, nde cho xa' ntote'd men lo xki's Dios.

<sup>12</sup> Mbli Dios jwan' re' sa re men ya tote'd xa' re men yez Dios, sa li xa' sin' jwan' mdaya' Dios li xa', sa re men yodo' jwan' nak ben Crist xyen xa',

<sup>13</sup> axta kebe' thita ak reta na' lo jwan' ndli lazon' nde xa' ncholon' Xin' Dios, nde gak na' men gal', xa' ngol xgab na' ta xa' nak Crist,

<sup>14</sup> sa na'akta' na' xa' nak re or bix jwan' atil nzye' xgab na', re xa' kwin' ndlo' jwan' na'lida nalitra' xa' gan kwin'no xa' na' sa li xa' li lazon' jwan' nagal'ta, nde nalid xa' gan tokan xa' na' lo re jwan' narax.

<sup>15</sup> Che'la tyoken' xis jwan' li nde ke' lazon' tan', sa xyen na' nde ak na' xaja nak Xa' nak yek lon', Xa' ya nak Crist.

<sup>16</sup> Ta xa' re yib ndli nzota dib ben men sa thita nkey sin', ta nak men yodon' Dios, Crist ntenta dib yodon' Xa', ben' xa' nak sin' ndli thiba men, nde sen' kad thiba men naxut nke sin' ndla'sto tan', tamod mas ndoyak ne yodo' nde ndoxena tak nke' lazo' men ta men.

### *Thi mod kub ban men*

<sup>17</sup> Jwan' re' nin nde nya'b na lo go' por yalnyebe' chan' Jesucrist: Na'ketetra' go' xa' ngete re men na'nzolod Dios, re xa' ya ngete axaja nak xgab nzo yek xa' jwan' ngencho sin' li,

<sup>18</sup> ngok ne yek xa' tak ngete tij xa' lo yalnaban jwan' nda' Dios, na'akta yen xa' jwan' li, tak ne lazo' xa'.

<sup>19</sup> Na'ngentra' yantho lo xa', thiptane mdaya' xa' lazo' xa' lo re ned yalxkap, nde nanchoched lazo' xa' thibla ndli xa'y.

<sup>20</sup> Mbay, le' go' namte'dta go' re jwan' na lo Crist,  
<sup>21</sup> tez liga mbin go' di's wen chan' Jesucrist nde mblo' Xa' lo go' xata nak jwan' li nak Jesus.

<sup>22</sup> Le' re mod gox ta mban go' pola, bla' go' reta jwan' na, tak mkwin'noy go' nde mtokan na lazo' go'.

<sup>23</sup> Btokub go' xgab go' lo re jwan' nak go'.

<sup>24</sup> Ndablo ban go' mod kub jwan' mda' Dios, ta xa nak Xa', lo' gal' nde nayon ban go', xa ndej di's li chan' Dios.

<sup>25</sup> Jwan' nasa, nakwin'tra' go', pta' go' kwent li lo ta men go', tak thita nak reta na'.

<sup>26</sup> Tez nchak nayi' go', na'ta'd go' di's li jwan' narax gan lo go', btoyal go' kwent sen' tera' bix wiz,

<sup>27</sup> nekla ta' go' di's lo maxu'.

<sup>28</sup> Xa' jwan' ndli wan', na'liwan'tra' xa', che'la ndablo ke xa' sin', kon ya' xa' li xa' jwan' wen, sa keno xa' jwan' ta' xa' lo re men nakin'na.

<sup>29</sup> Nek thib di's xkap naryo'da ro go', che'la mni go' di's wen nde di's jwan' li xyen go', sa tamod re xa' jwan' gon xki's go' wen liy lo xa'.

<sup>30</sup> Na'konabilta go' lazo' Mbi Nayon chan' Dios, Xa' nak thi be' mtob Dios lad go' sa sen' sin wiz thibtane tola' Xa' go' toyal libe' Xa' go'.

<sup>31</sup> Bla' go' yalnaxi, na'kod go' xyan lazo' go', na'aknayi'd go', na'kweznod go' re men, na'todi'snaraxta go' xis ta men go' nde na'lid go' jwan' narax.

<sup>32</sup> Che'la wen gok go', nde blat lazo' go' ta men go', ta xa mton' Dios xken go' por Crist, taga' btori'd yek go' re jwan' narax ndli ta go' lo go'.

## 5

*Xa ndablo kete re xin' Dios*

<sup>1</sup> Bli go' ta xa ndli Dios, xajka xin' Xa' jwan' nke' toz lazo' Xa'.

<sup>2</sup> Pke' lazo' go' ta go', ta xa mke' lazo' Crist na' nde mdaya' Xa' lazo' Xa' nguj Xa' por na' xaja' thi jwan' yon jwan' naxe' ndya' mbro' lazo' Dios.

<sup>3</sup> Per re lo jwan' xkap ndli men kon xa' na'nakta sal' men, o choja' re lo jwan' bew ta nak, o le' ta tyabla's men chan' xaga men, ana' yaj jwan' re xij go', le' go' ndablo ban xajka men nayon chan' Dios,

<sup>4</sup> na'nid go' re di's narax, re di's ndoja ndye, nde nekla re di's xin, tak re jwan' na na'le'da naka, che'la ndablo ta' go' dyux lo Dios.

<sup>5</sup> Tak mne wenla go' jwan' re, nek thib xa' jwan' ndli re lo jwan' xkap kon xa' na'nakta sal' xa', xa' ndli re jwan' bew, nde xa' jwan' ndya'blas keno masra jwan', naka xaja' xa' ndyonke xis mnab, re xa' ya na'kaya'd xa' jwan' ta' Dios ten' nyebe' Dios nde Crist.

<sup>6</sup> Na'tad go' di's kwin'no men go' kon re yalk-win', tak por xke re jwan' re' sa nde yalnayi' chan' Dios xis re xa' jwan' na'nxobyekta Dios.

<sup>7</sup> Jwan' nasa, na'saltad go' re xa' ta ndli jwan' naraxa, sa nalid go' jwan' ndli xa'.

<sup>8</sup> Tak pola ngok go' yal'kow, per naya nak go' xni tak ncholo go' Crist, bkete go' xajka xin' xni.

<sup>9</sup> (Tak jwan' nda' Mbi Nayon nak, yalwen, jwan' gal nde jwan' li),

<sup>10</sup> Thibla' blo'be' go' jwan' ndryo' lazo' Xa' Nyebe'.

<sup>11</sup> Na'lid go' re jwan' narax ngencho sin' ndli ta ndli re xa' ngete lo yal'kow, che'la brez go' yek xa' sa nye xa' narax nak jwan' ndli xa'.

<sup>12</sup> Tak axta yantho ndye tej men re jwan' narax naga's ndli xa'.

<sup>13</sup> Tak reta jwan', sen' ndryoxo'ba lo xni, toyal wi' men xa nakpe'y, tak xni ndli ndryoxo'b retey.

<sup>14</sup> Jwan' nasa nchab:

Lu ta naxyat, broxkal',  
goche xij re men nguj,  
nde toxni Crist loa.

<sup>15</sup> Jwan' nasa, ndawi' toz go' xa ngete go', na'lid go' xa ndli re men ne yek na', che'la gok go' men nchen.

<sup>16</sup> Jwin blirsin' go' tyemp, tak re wiz nzo jwan narax.

<sup>17</sup> Jwan' nasa, na'gakta go' men na'nchenta, che'la thibla' byen go' kwan nak jwan' nchola's Xa' Nyebe'.

<sup>18</sup> Na'tyusta go', tak le'y ndli ndoja jwan' narax ndli go', che'la bta' go' di's lo Mbi Nayon nyebe' Xa' lazo' go'.

<sup>19</sup> Bil' go' re salmos, himnos nde re di' ntob mbi Nayon lazo' go' sa kone go' lazo' ta go', bil' go' nde bli naro go' Xa' Nyebe' kon dib nzo lazo' go',

<sup>20</sup> por le Jesucrist Xa' Nyebe' lon', thibla' bta' go' dyux lo Xud na' Dios por reta jwan'.

*Bxob yek go' ta go'*

<sup>21</sup> Bxo'b yek go' ta go' tak tamod ndlo' nseb lazo' go' Dios.

<sup>22</sup> Re ngol ndob sal' na', xo'b yek ngol sal' ngol, ta xa nxo'b yek ngol Xa' Nyebe',

<sup>23</sup> tak xa' bi' nak yek lo xa' got xa', ta xa Crist nak yek lo yodo'. Crist nak Xa' ntola' yodo' jwan' nak dib ben Crist.

<sup>24</sup> Ta xa yodo' nxo'byek xa' Crist, taga' re ngol xob yek ngol sal' ngol lo reta jwan'.

<sup>25</sup> Re go' xa' bi', pke' lazo' go' xa' got go', ta xa nke' lazo' Crist yodo', nde ta xa mdaya' Xa' lazo' Xa' por yodo'.

<sup>26</sup> Jwan' re' mbli Xa' sa mbli nayon Xa' na' jwan' nak yodon' Xa', mtach Xa' na' kon nit nde kon xki's Xa',

<sup>27</sup> sa tamod koto Xa'y le'ga lo Xa', thi yodo' nathoz nawe nya, xaja thi lar jwan' na'ndoyoda nde na'nachunta, thi yodo' nandlida nek thib jwan' narax che'la nayon nde nambila's aka.

<sup>28</sup> Taga' re xa' bi' ndablo ke' lazo' xa' ngol xa', ta xa nke' lazo' xa' dib ben xa'. Xa' jwan' nke' lazo' ngol na', nke' lazo' xa' le'ga xa'.

<sup>29</sup> Tak ngencho ngotal le'ga dib ben na', che'la nda' xa' jwan' nakin'na nde nkenap xa'y, ta xa ndli Crist nkenap Xa' yodon' Xa'.

<sup>30</sup> Tak ta xa nak dib ben men jwan' thita ndentay kon bel' nde zij, taga nak na' kon Crist.

<sup>31</sup> "Por jwan' re' sa la' men bi' xud xa' nde xna' xa' sa kaya' xa' sal' xa' nde thita ak rop xa'."

<sup>32</sup> Naro nak di's nanga's re', le' na ndej jwan' re'ya xa nak Crist nde yodo'.

<sup>33</sup> Jwan' nasa, kad thiba go' pke' lazo' go' ngol go' ta xa nke' lazo' go' le'ga go', nde le' ngol ndablo xobyek xa' sal' xa'.

## 6

<sup>1</sup> Re go' mdyen', bin go' di's ro xud go', jwan' re' ndryo' lazo' Xa' Nyebe', tak jwan' re' nak jwan' gal'.

<sup>2</sup> Jwan' re' nak yalnyebe' ner ndeno jwan' mkeyek Dios ta' Dios, le'y nak: "Bxob yek xud la nde xna'a,

<sup>3</sup> sa nabe'z yoa nde bro ban la lo izyo."

<sup>4</sup> Re go' xud mdyen', na'toxid go' lazo' xin' go', che'la naxu'ta bxen' go' or nde btobe' go' yek or xata nchab lo xki's Xa' Nyebe'.

<sup>5</sup> Reta go' ta nak mos, bin go' di's ro xwan' go' lo izyo re', dib nzo lazo' go' bxob yek go' nde bseb lazo' go' xa', ta xa ndli go'y lo Crist.

<sup>6</sup> Na'lid go'y ben'ta sen' ndowi' xa' lo go' sa wen yan' go' lo xa', che'la bli go'y xajka xa' ndli sin' lo Crist, ngeli go' jwan' nchola's Dios kon dib nzo lazo' go'.

<sup>7</sup> Dib nzo lazo' go' bli go' sin', xajka xa' ngeliy lo Crist nde nangelidey lo men.

<sup>8</sup> Tak mnela go', Xa' Nyebe' ta' jwan' nzal' kad thiba men a xa nak jwan' wen ndli men, one cho men nak mosa o na'nakta mosa.

<sup>9</sup> Nde re go', xa' nak xwan' mos, taga' bli go' kon re mos go', na'gabta go' lo xa' toti go' xa', mnela go', thita Xa' Nyebe' lo go' nde lo mos, Xa' ya ndob lo be', nde na'mbid Xa' men.

### *Jwan' nda' Dios tyosa' men*

<sup>10</sup> Jwan' re' nak thib jwan' nin lo go', wes na nde btan' na, ptob go' xgab go' lo yalne ro chan' Xa' Nyebe' sa yone lazo' go'.

<sup>11</sup> Blirsin' go' reta jwan' mda' Dios lo go', xaja re yi'b ntap sondad, sa ne tyo go' sen' nchola's Maxu' tokan xa' go'.

<sup>12</sup> Tak nangenod na' yalbyo kon re ta men na', che'la ngenon' yalbyo kon re xbi narax jwan' ngeno yalnyebe' nde yalne, kon re xbi nyebe' lo yal'kow xis izyo re', nde kon reta ned xbi narax jwan' nyebe' lo be'.

<sup>13</sup> Jwan' nasa, blirsin' go' reta jwan' mda' Dios lo go' xaja re yi'b ntap sondad, sa xek go' lo sin wiz narax nde ne tyo go' axta kebe' yoloy.

<sup>14</sup> Jwan' nasa ne pto go' lo jwan' li nde jwan' gal', sa kenapa go', xaja sinch len' sondad nde yi'b ntap lazo' xa'.

<sup>15</sup> Nde ptoza' go' sa tej go' di's wen jwan' nda' yalnabe'z, tak jwan' na nak xaja sen' lo nge yalyid ni go'.

<sup>16</sup> Taga' thibla bli lazo' go' Jesucrist, tak jwan' re' nak xaja thi jwan' ntap go', sa tu' go' ki ndob lo flech jwan' ngobi maxu' xis go'.

<sup>17</sup> Lo ta mtola' Dios go', bli rsin' go'y sa tapa yek go', xaja cho ta ntap yek sondad, nde bxen go' xki's Dios xaja' espad jwan' nda' Mbi Nayon lo go'.

<sup>18</sup> Thibla' btodi'sno go' nde mna'b go' lo Dios, ndoli go'y xa ndogoned Mbi Nayon go', nde thibla bresa' go', na'zanta go' nde mna'b go' lo Dios por re men yez nayon chan' Xa'.

<sup>19</sup> Taga' mna'b go' lo Dios por na, sa sen' lo nin, Dios tob di's ron sa ne nzo lazo'n tej na lo men di's naga's nzo lo di's wen chan' Jesucrist.

<sup>20</sup> Dios mtel' na tej na di's wen chan' Jesucrist nde jwan' na ndli nge'n lizyi'b. Mna'b go' lo Dios sa na'zyebta na tej na kwent chan' xki's Dios, xa

ndabloy.

*Lult dyux chan' Pab.*

<sup>21</sup> Tel na Tíquico, wes na' jwan' nke' lazon' nde xa' jwan' thibla' ndo ndli sin' lo Xa' Nyebe', xa' tej lo go' sa nye go' xomod ndob na nde nye go' kwan' ngelin.

<sup>22</sup> Mtel na xa' lo go' sa tej xa' xa nzi ná', nde sa yone lazo' go'.

<sup>23</sup> Xud na' Dios nde Jesucrist Xa' Nyebe' lon', li Xa' nabe'z kwe go', masra' ke' lazo' go' ta go' nde tadka ndoli lazo' go' Crist.

<sup>24</sup> Yalwen chan' Dios tyonoy reta xa' jwan' nke' lazon' Jesucrist Xa' Nyebe' lon' kon yalnke' lazo' jwan' na'ndluxta. Ta aka.



**El Nuevo Testamento en el idioma Zapoteco  
de Loxicha**  
**The New Testament in the Loxicha Zapotec language  
of Mexico**

**El Nuevo Testamento en el idioma Zapoteco de Loxicha**

copyright © 2025 Wycliffe Bible Translators, Inc.

Language: Loxicha Zapotec (Zapotec, Loxicha)

Contributor: Wycliffe Bible Translators, Inc.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-10

---

PDF generated using Haiola and XeLaTeX on 26 Jul 2025 from source files dated 10 Jul 2025

968619e6-cca2-5898-b8d1-3b961f3e1c32